

Ard-Stiúrthóireacht-Méadú agus Comharsanacht an Oirthir

Foilsíú folúntais le haghaidh phost

an Phríomhchomhairleora maidir le hAthmhuintearas agus Normalú sna Balcáin Thiar (Grád AD14)

(Airteagal 29(2) de na Rialacháin Foirne)

COM/2025/10476

Cé sinn

Mar a fhoráiltear i dTreoirlínte Polaitiúla 2024-2029 an Choimisiúin Eorpaigh, is riachtanas geostraitéiseach, eacnamaíoch agus morálta é cur le tabhairt chun críche ár nAontais. Táimid ag obair i ndlúthchomhar le tíortha is iarrthóirí agus le tíortha is iarrthóirí ionchasacha ar an gconair luaíocht-bhunaithe ar a bhfuil siad ag teacht isteach san Aontas, trí thacú leis na hathchóirithe struchtúracha is gá, lena n-urraim don smacht reachta agus do luachanna bunúsacha agus trína n-athléimneacht agus a n-ullmhacht a neartú. Táimid á chinntiú freisin go dtabharfar tacaíocht leanúnach don Úcráin, agus go háirithe tacóimid le hatógáil agus aontachas na hÚcráine, agus oibreoidimid chun feabhas a chur ar an gcomhar leis an Tuirc maidir le cúrsaí polaitiúla, eacnamaíocha agus trádála chomh maith le tacú le tíortha Chugais Theas.

I réimse an mhéadaithe, tugann an Ard-Stiúrthóireacht um Méadú agus Comharsanacht an Oirthir (AS ENEST) cúnamh do na tíortha sin atá ag iarraidh teacht isteach san Aontas, na critéir atá leagtha amach sa Chonradh ar an Aontas Eorpach agus ag an gComhairle Eorpach a chomhlíonadh. Déanann AS ENEST dlúthfhaireachán ar dhul chun cinn na dtíortha is iarrthóirí ionchasacha ar bhallraíocht san Aontas agus tacaímid le caibidlíocht aontachais de réir mar atá leagtha síos ag an gComhairle. Bainistíonn an AS caidreamh déthaobhach an Aontais le tíortha is iarrthóirí agus tíortha is iarrthóirí ionchasacha ar bhallraíocht san Aontas agus tugaimidaird ar leith ar athchóirithe a bhaineann leis an smacht reachta, le rialachas eacnamaíoch agus le hathchóiriú ar an riarachán poiblí.

Bainistíonn AS ENEST an chuid is mó de chúnamh airgeadais agus teicniúil an Aontais do na tíortha is iarrthóirí nó is iarrthóirí ionchasacha ar bhallraíocht san Aontas, chomh maith le tíortha nó daoine i gcomharsanacht Oirthear an Aontais, lena n-áirítear an Airméin, an Asarbaiseáin agus an Bhealarúis. Go háirithe, bainistíonn sé an Ionstraim um Chúnamh Réamhaontachais (IPA III), an Ionstraim um Chomharsanacht, Forbairt agus Comhar Idirnáisiúnta - an Eoraip Dhomhanda (NDICI-GE), an tSaoráid Athchóirithe agus Fáis le haghaidh na mBalcáin Thiar, agus an tSaoráid don Úcráin, chomh maith le trí chreat infheistíochta: an Ciste Eorpach um Fhorbairt Inbhuanaithe (CEFI+), Creat Infheistíochta na mBalcáin Thiar, agus an Creat Infheistíochta don Úcráin, lena soláthraítear ráthaíochtaí buiséadacha, ionstraimí airgeadais agus cumasc.

Trí ghníomhaíochtaí cúnamh a chur chun feidhme i gcomharsanacht Oirthear na hEorpa, tacaíonn AS ENEST leis an athchóiriú agus leis an gcomhdhlúthú daonlathach, agus neartaíonn sí an rathúnas, an chobhsaíocht agus an tslándáil ar fud na hEorpa. Tugann AS ENEST cuidiú luachanna, beartais agus leasanna an Aontais a chur chun cinn sa réigiún sin, agus cuireann sí le forbairt an chaidrimh speisialta idir an tAontas agus na tíortha comharsanachta.

Tá AS ENEST suite sa Bhruiséil agus tá thart ar 1200 ball foirne aici sa Bhruiséil agus i dToscaireachtaí an Aontais sna tíortha comhpháirtíochta.

An tairiscint

Post an Phríomhchomhairleora, mar atá comhairle agus tacaíocht a thabhairt don Ard-Stiúrthóir i réimsí beartais an athmhuintearais agus an normalaithe caidrimh idir comhpháirtithe na mBalcán Thiar chun tacú le straitéis an Aontais um méadú agus i gcomhréir leis an bPlean Fáis do na Balcáin Thiar.

Faoi mhaoirseacht dhíreach an Ard-Stiúrthóra, déanfaidh an t-iarrthóir a n-éireoidh leis an méid seo a leanas:

- Comhairle straitéiseach a chur ar fáil i réimsí beartais ábhartha atá nasctha go díreach le hathmhuintearas agus normalú caidrimh idir comhpháirtithe sna Balcáin Thiar;
- Comhairle a thabhairt faoi conas dreasachtaí breise a chruthú le haghaidh an chomhair réigiúnaigh a bhaineann leis an sainordú;
- Féachaint leis an gcomhar idir gníomhaithe inmheánacha i dtíortha comhpháirtíochta a neartú agus a éascú;
- Comhordú comhleanúnach a chinntiú ar fud an Choimisiúin agus le páirtithe leasmhara seachtracha, lena n-áirítear an tSeirbhís Eorpach Gníomhaíochta Seachtraí;
- Comhairle straitéiseach a chur ar fáil faoi shaincheisteanna déthaobhacha;
- Ionadaíocht a dhéanamh don Choimisiún ar leibhéal sinsearach ag imeachtaí seachtracha a bhaineann leis an sainordú athmhuintearais agus normalaithe sna Balcáin Thiar

Cad atá á lorg againn (na critéir roghnúcháin)

Ba cheart na tréithe seo a leanas a bheith ag iarrthóirí:

Buanna pearsanta

- Scileanna an-mhaith anailíseacha agus an cumas fadhbanna eagrúcháin agus oibríochta a réiteach,
- Taithí ar ionadaíocht a dhéanamh d'eagraíocht ar ardleibhéal, go himmheánach agus go seachtrach araon, mar aon le sárscileanna cumarsáide, ionadaíochta agus caibidlíochta chun dul i dteagmháil go héifeachtach agus chun teagmhálacha ardleibhéil a choinneáil ar bun laistigh den Choimisiún, le hinstiúidí eile de chuid an Aontais agus le hinstiúidí idirnáisiúnta, leis na Ballstáit, agus le páirtithe leasmhara ábhartha eile,
- Ionracas, solúbthacht, agus athléimneacht faoi bhrú chomh maith le tiomantas do luachanna na seirbhíse poiblí agus do chuspóirí eagraíochtúla.

Sainscileanna agus saintaithí

- Eolas an-mhaith agus taithí an-mhaith ar bheartais an Aontais maidir le Méadú i gcoitinne,
- Taithí chruthaithe mar chomhairleoir sinsearach ar an leibhéal polaitiúil ar ghnóthaí idirnáisiúnta agus béim ar leith ar na Balcáin Thiar,
- Tuiscint an-mhaith agus eolas domhain ar stair, polaitíocht agus cultúr Chomhpháirtithe na mBalcán Thiar,

- Eolas agus tuiscint an-mhaith ar bheartais agus tosaíochtaí an Aontais,
- Cúlra láidir sa Dlí Idirnáisiúnta.

Scileanna comhairleacha

- Cumas a bhfuil cruthúnas air a bheith ag obair i ról comhairleach sinsearach i leith beartais maidir le méadú agus Comharsanacht Oirthear na hEorpa,
- Ciall an-mhaith don pholaitíocht agus tuiscint an-mhaith ar thimpeallacht pholaitiúil chasta, an cumas dearcadh domhanda a fhorbairt maidir le beartais AS ENEST,
- An cumas comhairle bheartais, pholaitiúil agus chumarsáide a chur ar fáil faoi shaincheisteanna casta, agus aird ar leith á tabhairt ar na príomh-shaincheisteanna agus na príomhthosaíochtaí a bhaineann leis na Balcáin Thiar, i gcomhréir le beartas an Aontais um méadú.

Ní mór d'iarrthóirí na ceanglais seo a leanas a chomhlíonadh (ceanglais incháilitheachta)

Ní chuirfear san áireamh le haghaidh na céime roghnúcháin ach iarrthóirí a chomhlíonfaidh na ceanglais fhoirmiúla seo a leanas **faoin sprioc-am le hiarratas a dhéanamh:**

- Náisiúntacht: ní ghlacfar le hiarratas ach ó dhaoine a bhfuil saoránacht ceann de na Ballstáit an Aontais Eorpaigh acu.
- Céim ollscoile nó diplóma: ní mór d'iarrthóirí:
 - leibhéal oideachais a bheith acu is comhionann le cúrsa iomlán ollscoile ar baineadh diplóma amach dá bharr i gcás ina maireann an ghnáth-thréimhse oideachais ollscoile 4 bliana nó níos mó;
 - sin nó leibhéal oideachais a bheith acu is comhionann le cúrsa iomlán ollscoile ar baineadh diplóma amach dá bharr agus taithí ghairmiúil iomchuí dar fad bliain amháin ar a laghad i gcás ina maireann an ghnáth-thréimhse oideachais ollscoile 3 bliana ar a laghad (ní féidir an bhliain sin de thaithí ghairmiúil a chur san áireamh sa taithí ghairmiúil iarchéime atá luaite thíos).

Ní ghlacfar ach le diplómaí a bronnadh i mBallstát den Aontas Eorpach nó a bhfuil teastais chomhluacha ag gabháil leo a d'eisigh na húdaráis i gceann de na Ballstáit sin.

- Taithí ghairmiúil: ní mór d'iarrthóirí 15 bliana ar a laghad de thaithí ghairmiúil iarchéime¹ a bheith acu ar leibhéal ar féidir le duine tosú air ach na cáilíochtaí dá dtagraítear thuas a bheith aige.
- Taithí chomhairleach: ní mór 5 bliana ar a laghad den taithí ghairmiúil iarchéime a bheith aige i bpost comhairleach ardleibhéil².

¹ Ní chuirtear taithí ghairmiúil san áireamh ach amháin más caidreamh oibre iarbhrí atá i gceist léi, caidreamh arb é an sainmhíniú atá air fíorobair a bhfuarthas pá aisti i gcáil fostaí (ar aon chineál conartha) nó soláthraí seirbhíse. Gníomhaíochtaí gairmiúla a rinneadh ar bhonn páirtaimseartha, is ar bhonn *pro rata* a dhéanfar iad a ríomh, de réir an chéatadán dheimhnithe de na huairéanta lánaimseartha a d'oibrigh an t-iarrthóir. Cuirtear san áireamh saoire mháithreachais/saoire tuismitheora/saoire chun páiste a uchtú, más faoi chuimsiú conradh oibre atá sí. Is cuid den taithí ghairmiúil í dochtúireacht, fiú amháin nuair nach dochtúireacht ar pá í, ach tá uastréimhse 3 bliana i gceist leis sin, agus ní mór an dochtúireacht a bheith curtha i gcrích. Ní féidir aon tréimhse ar leith a chomhaireamh ach uair amháin.

- Teangacha: ní mór d'iarrthóirí eolas cuimsitheach a bheith acu ar cheann de theangacha oifigiúla an Aontais Eorpaigh³ agus eolas sásúil a bheith acu ar cheann eile de na teangacha oifigiúla sin. Deimhneoidh na painéil roghnúcháin le linn na n-agallamh go gcomhlíonann iarrthóirí an ceanglas maidir le heolas sásúil ar cheann eile de theangacha oifigiúla an Aontais Eorpaigh. Mar chuid den tástáil chéanna d'fhéadfaí an t-agallamh nó cuid den agallamh a dhéanamh sa teanga eile sin.
- Teorainn aoise: ní mór d'iarrthóirí a bheith faoi bhun na gnáthaoise scoir, aois a bhfuil sé sainithe gurb éard atá i gceist léi, i gcás oifigh an Aontais Eorpaigh, deireadh na míosa ina mbeidh 66 bliana slán ag an duine (féach Airteagal 52, pointe (a) de na Rialacháin Foirne⁴).

Roghnú agus ceapadh

Is de réir nósanna imeachta roghnúcháin agus earcaíochta an Choimisiúin Eorpaigh a dhéanfar an roghnú agus an ceapadh (féach: an Doiciméad maidir leis an mBeartas um Oifigh Shinsearach⁵).

Mar chuid den phróiseas roghnúcháin seo, cuirfidh an Coimisiún Eorpach painéal réamhroghnúcháin ar bun. Déanfaidh an painéal sin anailís ar na hiarratais go léir, déanfaidh siad an chéad fhíorú incháilitheachta ina dhiaidh sin agus sainaithneoidh siad na hiarrthóirí a bhfuil na próifílí is fearr acu i bhfianaise na gcritéar roghnúcháin thuasluaite, agus a bhféadfaí cuireadh a thabhairt dóibh agallamh a dhéanamh leis an bpainéal réamhroghnúcháin. Féadfar a iarraidh ar iarrthóirí doiciméid a thacaíonn leis an eolas atá ina n-iarratas a chur ar fáil tráth ar bith le linn an nós imeachta. Mura gcuirfear na doiciméid sin ar fáil laistigh den sprioc-am atá leagtha síos san iarraidh, d'fhéadfaí iad a fhágáil as an áireamh ón roghnúchán.

Tar éis na n-agallamh sin, déanfaidh an painéal réamhroghnúcháin a gcuid conclúidí a tharraingt suas, agus molfaidh siad liosta iarrthóirí le haghaidh agallaimh eile le Coiste Comhairleach an Choimisiúin Eorpaigh um Cheapacháin. Cuirfidh an Coiste Comhairleach um Cheapacháin conclúidí an phainéil réamhroghnúcháin san áireamh agus é ag cinneadh cé na hiarrthóirí a dtabharfar cuireadh chun agallaimh dóibh.

Na hiarrthóirí a dtabharfar cuireadh chun agallaimh leis an gCoiste Comhairleach um Cheapacháin dóibh, glacfaidh siad páirt in ionad measúnaithe bainistíochta a mhairfidh lá iomlán agus a reáchtálfaidh comhairleoirí earcaíochta seachtracha. Tiomsóidh an Coiste Comhairleach um Cheapacháin gearrliosta d'iarrthóirí a mheasann siad a bheadh oiriúnach don phost, i bhfianaise thorthaí an agallaimh agus thuarascáil an ionaid measúnaithe.

Is é an Comhalta/is iad na Comhaltaí ábhartha den Choimisiún a chuirfidh agallamh ar na hiarrthóirí atá ar ghearrliosta an Choiste Chomhairligh um Cheapacháin.

I ndiaidh na n-agallamh sin, déanfaidh an Coimisiún Eorpach an cinneadh ceapacháin.

Ní mór don iarrthóir a roghnófar aon oibleagáid dlí a bhaineann le seirbhís mhíleata a bheith comhlíonta aige, teistiméireachtaí carachtair cuí a chur ar fáil maidir lena oiriúnaí atá sé i dtaca lena chuid dualgas a dhéanamh, agus a bheith in ann ag a chuid dualgas ó thaobh folláine coirp de.

² Maidir leis na blianta uile ina bhfuair na hiarrthóirí taithí chomhairleach, ba cheart dóibh a léiriú go soiléir ina *curriculum vitae*: (1) teideal agus ról na bpost a bhí acu; (2) an réimse beacht ábhar mar aon leis an leibhéal san eagraíocht lenár bhain an post (an líon srathanna ordlathais os a gcionn agus faoina mbun); (3) línte tuairiscithe do gach post a bhí acu.

³

<http://eur-lex.europa.eu/legal-content/EN/TXT/PDF/?uri=CELEX:01958R0001-20130701&qid=1408533709461&from=ENhttps://eur-lex.europa.eu/legal-content/GA/TXT/?uri=CELEX%3A01958R0001-20130701>

⁴ <https://eur-lex.europa.eu/legal-content/GA/TXT/?uri=CELEX%3A01962R0031-20140701>

⁵ https://commission.europa.eu/publications/documents-senior-management-selection-procedures_en (ar fáil i mBéarla amháin)

Ba cheart don iarrthóir a roghnófar deimhniú bailí imréitigh slándála óna údarás náisiúnta slándála a bheith aige nó a bheith in ann an deimhniú sin a fháil. Is éard atá in imréiteach slándála pearsanta cinneadh riaracháin a dhéantar i ndiaidh d'údarás náisiúnta slándála inniúil an duine grinnfhiosrúchán slándála a chur i gcrích i gcomhréir leis na dlíthe agus na rialacháin náisiúnta slándála is infheidhme, agus ina bhfuil deimhniú go bhféadfar cead a thabhairt don duine sin rochtain a fháil ar fhaisnéis rúnaicmithe suas le leibhéal áirithe. (Tabhair do d'aire gur ar iarraidh an fhostóra amháin is féidir tús a chur leis an nós imeachta is gá maidir le himréiteach slándála a fháil, agus nach féidir sin a dhéanamh ar iarraidh an iarrthóra).

Ní bheidh rochtain ag an iarrthóir ar fhaisnéis rúnaicmithe AE (FRAE) ar an leibhéal CONFIDENTIEL UE/EU CONFIDENTIAL nó os a chionn sin, ná ní fhreastalóidh sé ar aon chruinniú ag a bpléifear FRAE den sórt sin, go dtí go dtabharfaidh an Ballstát lena mbaineann an t-imréiteach slándála pearsanta agus go gcuirfear an nós imeachta imréitigh i gcrích leis an seisiún faisnéise ó Stiúrthóireacht Slándála an Choimisiúin, seisiún atá ina cheanglas dlí.

Comhdheiseanna

I gcomhréir le hAirteagal 1d de na Rialacháin Foirne, saothraíonn an Coimisiún an cuspóir straitéiseach, mar atá, an comhionannas inscne a bhaint amach ar gach leibhéal bainistíochta agus cuireann sé beartas comhdheiseanna i bhfeidhm lena spreagtar iarratais a d'fhéadfadh cur leis an éagsúlacht, leis an gcomhionannas inscne agus leis an gcothromaíocht gheografach fhoriomlán.

Coinníollacha fostaíochta

Tá na tuarastail agus na coinníollacha fostaíochta leagtha síos sna Rialacháin Foirne.

Is mar oifigeach ar ghrád AD14 a earcófar an t-iarrthóir a roghnófar. Rangófar an t-iarrthóir roghnaithe i gcéim 1 nó i gcéim 2 laistigh den ghrád sin, de réir fhad a thaithí gairmiúla roimhe sin.

Ba chóir don iarrthóir a roghnófar a thabhairt dá aire go gceanglaítear de réir na Rialachán Foirne nach mór do gach ball foirne nua tréimhse phromhaidh 9 mí a chur i gcrích agus toradh sásúil a bheith uirthi.

Is sa Bhruiséil, an Bheilg, atá an t-ionad oibre.

Beidh an folúntas ann ón 1 Eanáir 2026 amach.

Neamhspleáchas agus dearbhú leasanna

Beidh ar iarrthóirí dearbhú a thabhairt go bhfuil siad tiomanta do bheith ag gníomhú go neamhspleách ar mhaithe leis an bpobal, agus dearbhú a thabhairt maidir le haon leas atá acu a d'fhéadfaí a mheas a bheith dochrach dá neamhspleáchas.

Eolas tábhachtach d'iarrthóirí

Cuirtear i gcuimhne d'iarrthóirí gur faoi rún atá an obair a dhéanann na painéil roghnúcháin. Tá cosc ar iarrthóirí dul i dteagmháil, go díreach nó go hindíreach, le comhaltaí na bpainéal sin, agus tá cosc ar aon duine eile déanamh amhlaidh thar a gceann. Ní mór gach fiosrúchán a sheoladh chuig rúnaíocht an phainéil lena mbaineann.

Cosaint sonraí pearsanta

Cinnteadh an Coimisiún go bpróiseálfar sonraí pearsanta na n-iarrthóirí mar a cheanglaítear le Rialachán (AE) 2018/1725 ó Pharlaimint na hEorpa agus ón gComhairle⁶. Baineann sin go háirithe le rúndacht agus le slándáil na sonraí sin.

Nós imeachta um iarratais

Sula gcuirfidh tú an t-iarratas isteach, ba cheart duit a sheiceáil go cúramach an gcomhlíonann tú gach ceann de na ceanglais incháilitheachta ('Ní mór d'iarrthóirí na ceanglais seo a leanas a chomhlíonadh'), go háirithe iad siúd a bhaineann leis na cineálacha dioplóma, leis an taithí ghairmiúil ardleibhéil agus leis an acmhainn teangacha atá ag teastáil. Má bhíonn aon cheann de na riachtanais incháilitheachta gan comhlíonadh, eisiafar an t-iarrthóir go huathoibríoch ón bpróiseas roghnúcháin.

Más mian leat iarratas a dhéanamh, ní mór duit clárú tríd an idirlíon ar an suíomh gréasáin seo thíos agus na treoracha maidir leis na céimeanna éagsúla den phróiseas a leanúint:

<https://ec.europa.eu/dgs/human-resources/seniormanagementvacancies/>

Ní mór seoladh ríomhphoist bailí a bheith agat. Bainfear úsáid as an seoladh ríomhphoist sin chun do chlárúchán a dheimhniú agus chun dul i dteagmháil leat ag céimeanna éagsúla den phróiseas. Dá bhrí sin, coinnigh an Coimisiún Eorpach ar an eolas faoi aon athrú ar do sheoladh ríomhphoist.

Chun iarratas a chríochnú, ní mór duit CV a uaslódáil i bhformáid PDF, i bhformáid CV Europass⁷ más féidir, agus litir inspreagtha a líonadh isteach ar líne (uasmhéid 8 000 carachtar). Is féidir leat an CV agus an litir inspreagtha a chur isteach in aon cheann de theangacha oifigiúla an Aontais Eorpaigh.

Is chun do leasa é a chinntiú go bhfuil d'iarratas cruinn, críochnúil agus fírinneach.

Ar chríochnú do chlárúcháin ar líne duit, gheobhaidh tú ríomhphost a dheimhneoidh gur cláraíodh d'iarratas. **Mura bhfaighidh tú ríomhphost deimhniúcháin, níor cláraíodh d'iarratas!**

Tabhair do d'aire nach féidir monatóireacht a dhéanamh ar dhul chun cinn d'iarratais ar líne. Rachaidh an Coimisiún Eorpach i dteagmháil go díreach leat maidir le stádas d'iarratais.

Ní ghlacfar le hiarratais a sheolfar le ríomhphost. Má bhíonn tuilleadh eolais uait nó má bhíonn fadhbanna teicniúla agat, seol ríomhphost chuig: HR-MANAGEMENT-ONLINE@ec.europa.eu

⁶ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, I ch. 39).

⁷ Tá eolas le fáil faoi conas CV Europass a chruthú ar líne ag: <https://europa.eu/europass/ga/create-europass-cv>

Is fútsa atá sé do chlárúchán ar líne a chríochnú in am. Moltar go láidir duit gan fanacht go dtí cúpla lá roimh an dáta deiridh chun iarratas a dhéanamh, mar go bhféadfadh trácht trom ar an idirlíon nó fadhb a bhaineann leis an nasc idirlín deireadh a chur leis an gclárúchán ar líne sula mbeidh sé críochnaithe agat, rud a d'fhágfadh go mbeidh ort an próiseas iomlán a dhéanamh athuair. Nuair a bheidh an sprioc-am le hiarratas a chur isteach thart, ní bheidh tú in ann tuilleadh sonraí a chur isteach. Ní ghlacfar le clárúcháin dhéanacha.

Dáta deiridh

Is é an **29/01/2026, 12.00 meán lae, am na Bruiséile**, an sprioc-am le clárú. Ní féidir clárú ina dhiaidh sin.